



Орган Лемковского Союза.

Выходит в каждый четверг.

Редакция и администрация в Крыниці. — Адрес „Лемко“ Крыница.

Пренумерата в краю:	
50 грошей місячно.	
2.50 зл. полрочно.	
5 зл. рочно	
В Америці: 1 дол. полрочно.	
2 дол. рочно.	
В Чехословакии:	
3 кор. місячно, 15 кор. полрочно,	
30 кор. рочно.	
Кonto чековe Нp. 404.155.	

Апостольский Визитатор принял делегацию Ставропигийского Института.

Уж в попередних числах „Лемка“ подано, што приїхал до Львова Апостольский Визитатор, Его Ексцеленция О. Йоан Гудечек.

Он принял дня 6. падолиста т. р. делегацию Ставропигийского Института во Львові, в склад котрой вошли сениор А. О. Гулла, зяступник сениора А. Н. Сивуляк и сындык Ставропигии д-р М. Р. Крижановский. Делегация вручила О. Визитатору мемориал, с додученыма до него девятима мемориялами и протестами, якы Ставропигия переслала до Апостольской Столицы в Римі и на котры де тепер не достала отвита.

В мемориялі том делетация представила О. Визитатору вшиткы новшества, введенны в послідних часах в нашей церкви. Она за-протестовала против нарушения патронатских прав при обсаджению прихода Ставропигийской церкви, против своевольного перекурчания богословских книг, против введения украинского языка в церковных книгах, против украинизации гр. кат. Церкви через введение украинского языка, против опіваня в церквах

світских пісень политычного зміста, против надуживаня амвона для политычной пропаганды, против переслїдованя рускых священников и неприниманя руской молодежи до богословских семинарии, против введения принудительного целибата, против продажи ерекциональных грунтов и ужитя одержаных за проданы грунты грошей на политычно-украинскы ціли и издавництво политычных-украинских газет, нпр. Пролом, Мета, Правда, Украинский Бескид, Нова Зоря и др., против выступления против Талергофским крестам и за упокойным талергофским богослужениям.

Делегация тотя порушила также справу утвореня отдільного лемковского гр. кат. епископства и много справ поодынокых.

Апостольский Визитатор выслушал делегацию уважно и запросил членов делегации на другой день до себе. Коли они явили ся, о. Визитатор сказал им, што в Римі уж от трех літ специальна комиссия ванмат ся студиями над утравалением текста богослужебных книг для гр. кат. церкви.

В справі утвореня отдільной лемковской епархии заявил о. Визитатор, што тотя справа была бы уж давно уладжена, если бы О. Нагорянский принял жертвованный ему владычий престол и прирек всі порушены делегацией моменты и справы рєзслїдити и предложити о них объективный доклад Папскому Престолу. Кромі того увїрил делегацию, што Апостольска Столица перестеригат остро, штобы епископаты не мішали ся до партийной и национальной борбы.

Апостольский Визитатор іде со Львова до Станиславова, а при конці того місяца або на початку грудня приїде до Перемышля.

Час близкий и тому треба як найскорше скликати по вшиткых наших селах собрания членов читальнь, кооперативов и громад и на тых собраниях ухвалити протест против надужитя и полатыканства в наших церквах. Ухвалы такы треба як найскорше присылати до администрации газеты „Лемко“.

Як стоит справа лемковского епископства.

Дня 12. листопада т. р. Апостольский Нунций в Варшаві принял у себе делегацию Лемков, зложену о 7 репрезентантов всіх лемковских повітов. Делегация вручила мемориал в ділі лемковской епархии. Именем Его Ексцеленции Апостольского Нунция заявил делегатам канцлер, што само діло утвореня отдільной независимой апостольской администрации для Лемков ест уж давно уладжено, а само обсаджено влече ся через тотя, што назначеный администратором О. Нагорянский не принял номинации. Справа однак ест на доброй дорозі и буде користо в коротком часі рішена.

Засіданє бюджетной комиссии сойма.

Дня 6. листопада скликано на основі рескрипта президента перше засіданє бюджетной сесии сойма. Открыл нарады маршал г-н Свительский, котрый выголосил бесїду, посвячену памяти убитого министра вн. діл. Перацкого и померших послов. Потом приступлено до отчитаня проекта скарбового закона и бюджетного прелюминара. Министр финансов Д-р Завадский выголосил долшу бесїду в котрой здал доклад о правительственной господарской политыці за минувший час и предложил плян господарки на слїдующий рок. Погодивше промовляли председатели поодынокых соймовых клубов оппозиционных. Они атаковали правительство за теперешну медженародну политыку Польщи, котра наближила ся до Німеччины и отдалила ся от Франции и ей союзников. Они крытыковали также ріжны порядкы в державной администрации и господарці. Найсильнїше выступили они однак против Картуз—Березы.

На тотж выступленя дал отвїт посол Ме-

дзинский, котрый річево и основательно представил потребу такой а не иной господарской политыки. Обговоряючи діло Картуз—Березы посол Медзинский заперечил рішительно тому, што до Березы берут людей, належачих до той, або другой партии, в особенности до партии польской народной. Там берут, сказал посол Медзинский, людей, котры своим роботом хотят выкликати в краю анархию. На доказ того посол Медзинский отчитал дакотры уступы с недозволенной и тайно издаваемой газеты „Нова Штафета“, в котрой ест написано, же теперешне правительство не ест правительством польским, але правительством зрадников, запроданных жидам и чужим. В газеті той пише ся также, што польский министр внутр. діл ест швагрем Литвинова и што министр Бек замордовал Зацвилюховского, я отрул министра Бернера, што санация хотїла убити Дрешера и што она убила министра Перацкого. Тоты, котры тотя писали,

ПОМІЩАЙТЕ
ОГОЛОШЕННЯ
В ГАЗЕТІ „ЛЕМКО“.

знали добре о том же то сут цыганства и брехня, але писали так тому, чтобы вводить анархию и допровадити край до братоубийственной войны. Брехи той газеты посунули ся так далеко, же аж и с председателя министров г-на Коваловского зробили жиду и назвали его Ушер Брунер, хец также авторы знают добре о том, же ест он шляхтичом с повіта Меховского. При конці тотя газета пише, же коли ся знае о том, же во главі правительства стоит жид, стае ся зрозуміле, чом тото правительство еаджат народных демократов до Березы и чом закрыло „Нову Штафету“.

Посол Медзвинский по отчитаню тых напастей со стороны авторов газеты „Нова Штафета“, сказав, што жадно правительство отвітественно не має права пушати безкарно таких річей. Закрыте таких людей [в Березі, то не ест ламане обоза народного, то ест ламане анархии. Не можеме мати претензии до правительства за отоссбнене таких ты-

пов, дійствующих такими методами.

Посол Медзвинский представил дальше в правдивом світлі польску заграничну политику, котру признав, яку рациональну и дал отвіт на напасть в ділі господарки внутрениой Польщі.

Нас заинтересуе однак може найбільше бесіда Дмитра Левицкого, яку он выголосил от имени украинского клуба, бо в той бесіді украинский голова выказал ничим необмежену злобу и ненависть, до вшиткого руского. Што он лем там не набесідовал о рускых читальнях, кооперативах талергофских святых и т. д. Украинский „діяч“ страшил в той бесіді поляков „російськими барвами“, одним словом робил тото вшитко, што робили украинцы с нами в часі войны.

На сесии сойма поединковы клубы зголосили цілый ряд интерпелляции. На другой день т. е. 7. листопада директор правного бюроа презыдии рады министров деручил маршалкам сойма и сената распоряджене презыдента, на основі котрого отложено сесии обох палат на 30 дней.

Як можеме собі помочи.

О том, же тепер сут тяжкы часы знае с нас каждый. Найтяжше однак жие ся нашими газдам, бо зеренце и другы землеплоды, а также и живина мають низку ціну, котра не стоит в жадной пропорции до цін товаров промисловых. Если отже газда на долах, на доброй и уроджайной землі днеска бідуе и ледво лучит с собою концы, то штеж додерживати у нас, где зеренце приносит брат брата, а часом и то ні, а трава на луках вырастат така, же ю лем в ночи при росі можна екосити, а драбняк треба обложити чатином, бо иначе вшитко сіно вытрапиш, занизм до дому приїдеши.

Штебы якоси зарезити той біді, люди прибігают к рішеним особам: Ту и там закладают ся по наших селам кооперативы, котры звичайно, екажме то собі отверте, не развивают ся належнито, а часами аж и укладают, бо не мають ище подготовленых до ведения кооперативов людей и сами не розуміме добре, яка ест ціль кооперации и што треба робити, штебы кооператив приносил доходы и развивал ся.

Робиме и другы пробы в ціли поправки нашего положеня господарчого. До таких належит передовсем приспособлене нашего господарства до условий, заміна в горах господарств рольных на господарства молочны и хову живины, годовля и поправа рас увец и т. д.

Ціла тотя акция так в напрямі оживления кооперацийного движеня як и в ціли приміненя новых дослідов в нашой рольной господарці ест безпорно користна и движене тото треба подпоровати, бо колиси в будучности принесет тот труд пожаданий хосен, але має оден недостаток, же результат той работы видне доперва по кількох, а часом аж и кільканадцетох роках, а мы хотіли бы позбыти ся біды як найскорше.

Лемковский Союз здае собі докладно справу с того положеня наших сел и хотячи прити селам с помочом, навязал сношеня с Торговельно-Промышленном Палатом в Кракові, штебы тотя послідна заохочала людей до приїзда до наших сел на літний отдых.

Штебы добре зрозуміти, яку користь гос-

подарчу може принести нашим селам приїзд в літі людей с міст, мусиме найперше подумати над тым, што дают взагалі горы. Горы могут быти причиною біды, але также могут они приносити богатства. Доказательства того мають на Альпах, особенно швайцарских, где горы добре використаны, приносят их жителям, швайцарцам, величезны доходы, бо люди с цілого світа с'їзджают ся там для прекрасных видов и чудного воздуха.

Горы кромі того могут быти двигателями машин, бо вода спливаюча с гор е великом силом пушат в движене колеса и турбины и вытворюе потребну для движеня машин енергию. В том случаю также горы приносят богатства.

В горах находят ся замчайно поклады руды желізоной, угля, репы, соли, серебра, міді и др. минералов, а на них растут величезны лісы, достарчаючи материал на будову и снаряды.

Але лісы и копалины сут то річи, котры вычерпуют ся—остае ся все лем краса гор и их здоровый воздух и вода и теты те природны богатства гор повинны мы у нас на Лемковщині використати. До того часу в той области не зроблено нич, або барз мало. Зложило ся на тоте дуже причин. В горах ест труднійша комунікация, дае ся отчути недостаток добрых дорсг межде селами и тому те люди рідше сходят ся с собою, як на долах и равнинах. Чужих людей, котры бы через горскы села переходили праві совсім не видно. То являт ся причиною, ште люди в горах заховали своей отрубный характер, свою приєдіву, свои звичаи, обычаи и свои пісні. Пісні тоты не еходят с гор, они идут их верхами и тому то у нас скорше можна почути пісню польску-гуральску, гуцульску або словацку, чим походячу с долов и равнин, бо и люди етыкают ся с собою на горах при рубаню дерев, при выпасі товару и увец. В горах ніт міст, ніт густых дорог, котрыма переходят чужы люди, ніт великих осередков культуральных, тому и культура робит в горах слабы поступы. Люди живут так як их діды, прадіды—так одівають ся, так будуют свои дома.

Хаты теты у нас на Лемковщині, хечи дост пространны, не раз не отвічают тым вимогам

якы мають люди с міст, котры хотіли бы приїхати в літі на село, штебы отдохнути по тяжком труді.

И ту же нас велика работа, если хочеме в скором часі поправити наши господарчи обставины, если хочеме позбыти ся біды, если хочеме, штебы у нас на селі появил ся засдаякий пінязь. Люди с міста при отвітной рекламі приїдут, але 1) они ехотят жити лем в таких селах, до котрых можна доїхати добрыма дорогами 2) мусят мати чисты дома с чисто удержанным двором, огородом и садом 3) мусят мати заповнену апровизацию, то значит село мусит выстарати ся им е тото штебы они достали на місці мясо, набіл, яриды и овочи. 4) В одном селі мусит быти больше домов до выхання для літників, бо люди любят товариство.

Села, котры постарают ся о тоте вшитко, могут числити напевне, што уж слідующего літа приїдут до них літники с міста и через тоте увеличат ся доходы того села. Штебы однак загарантовати як найбільшому числу доходы с туристыки, Лемко-Союз мусит знати докладно, килько котре село може выгоне помістити літников. Пожаданы сут также фотографичны снимкы хат, сел и краєвидов бо лем при поміщеню таких фотографии ест можлива добра реклама.

Лемковский Союз реєлюе также конкурсы на дві брошуры имено: 1) Як має выглядати село, яке літниское 2) Як має выглядати одна загорода, яке дом для літников. Для брошур тых сут предвиджены нагороды. Термин присылания брошур до конца грудня 1934. р.

В справі той будеме поміщати в каждом числі петребны информации, бо уважаме ю за важну. Оживлене движене туристычне оживит и наши кооперативы и годовля увец, бо приїзджнучи люди будут куповати товар, молоко и брынду.

Кору слов о кутю коней.

С моментом, коли человек освоил коня и начал уживати его до работы для своих цілей, старал ся он найбільше о его копыта, бо конь, живучи в неприродных условиях, трудячи ся тяжело на твердых, выхлястых дорогах, употребляный до долгых маршов, до тягненя товаров, скоро етерал собі рог копыта, в послідстві чого кудявил и етавал ся неспособным до работы. Войско Александра Великого, машеруючи через Азию, мусіло оставити на дорозі масу коней, котры не могли ити дальше в послідстві еидного стертя копыта.

Тому то уж от найдавніших часов старано ся о отвітне куте коней и хец не знамо ище в тых часах кутя копыт при помочи подковы, прибитой клинцами, то хоронено копыта екоряныма, або металевыма сандалами. Были то грубы бляшны металевы в виді подошвы копыта; тоты бляшкы мали на переді ушко а с заду гачик, через котрый перетігано мотузок або ремешчик, котрый тримал сандал на копыті. Першими, котры начали уживати подковы, прибиты до копыт желізными клинцами, были старожитны народы Галлі и Кельты. От них научили ся того Римляне. Словяне знают уж подковы в VIII. столітію, а вид тых подков отвічає подкові тыпа кельтського. До Польщі достала ся подкова,

подобно як и шабля дорогою сусідських сношень через напади и войны с турками и татарами от востока.

Разом с розвитком рыцарства, розвивала ся и годовия коней в Польщі, а с тым и штука кутя коней. Же уж втотчас здавано собі справу с того, як важне ест кутя коней, свідчит о том стара приповідка: „Цілы державы держат ся на одном гвозді, бо гвоздь держит подкову, подкова коня, конь рыцаря, рыцар город, а города цілы державы“


Прото тыж рыцары, ходили коло коня печаливо, сами кули его, а учили ся того в молодых літах, будучи ище мечаносцем.

Помеже добре окуте коня вымагало зручности и вправы, а кромі того и опыта, тому втотчас тых людей, котры уміли добре подкути коня други уважали и читили, а штораз больше запотребоване подков причинило ся до повстаня специального звания ковалей. В Кракові, як подає Колачковский, были уж цехы ковалей в р. 1400. Цехы тоты мали свой специальный закон, по котрому кандидат на ковальского майстра мусіл выказати ся ґрунтовным знанем с области ковальства, в противном случае комиссия его „дисквалификоувала“ (признавала негодным) на час 6 місячний и лем по том часі, кандидат терминуючи дальше, мог поддати ся другой раз экзамену.

Негодивше, коли вмісто рыцарства оборона державы польской перешла на войско, творят ся специальные этапы для ковалей в формаціях войсковых и втотчас подковничество зробило значны поступы. Причинили ся до того школы ветеринарийны, котры в XIX. столітї так в Польщі, як и сусідних краях были поставлены на високом уровні. На терені Галичини, правительство австрийске опекувало ся специально ковальством, устроивало при ветеринарийных амбулянсах школы кутя коней, в котрых требовало от практикуючих ковалей напущенной практики и умноченя курсу в школі кутя коней.

Продолженіе слѣдѹе.

ЧУДО ТЕХНИКИ! НОВОСТЫ АВТОМАТ-БРАУНИНГ 6 мм. автоматично вышмаряющий гильзы по выстрѣлі. Стрѣляти можна металловыми к длями до цілі, або шротом до птахов. Ядно оксидований, плоский и цілком безлечный. Оглушательный звук. ЦНА ЗЛ. 6'95. 2 штуки зл. 13. Авт мат на 8 куль зл. 18. Сотка куль зл. 3'75. Шотку до чищення зл. 6'95. Додаме даром. Не треба позволения полициі. Высыламе на писменне замовленіе за наложенным платежом почтовым. Адресовати: Wytwór. Br. E. Jakubinski, Warszawa, Leszno, 60 Z. O.



Важне для читалень.

На основі закона о обществах, каждая читальня мусит провадити книги: касову членских взносов, протокол собрань, библиотечну, выписки книг и реестр членов, на друках выдана Общества. Ревизор Общества буде контролировать каждую читальню на Лемковщині: пов. Новый-Санч, Горлицы, Ясло, с книговодства и касы, як также статутариу деятельность русских читалень.

Кромі того, в читальні повинен вѣіти на стіні портрет бл. пам. Мих. Качковского—фундатора нашего Общества и основателя Общества бл. пам. о. Іоанна Наумовича.

Реестр членов в оправі, портреты и всі издана Общества: книги, пѣсы для библиотек читалень, можна набыти у ревизора Общества, котрый замешкуе в КРИНИЦІ-ЗДРОЮ, вилия РЕДУТА.

Общ. им. М. Качковского во Львові.

С'їзд делегатов читалень и филий О-ва им. М. Качковского отбуде ся 25 грудня 1934. во Львові.

Початок нарад о год. 10 рано в салі „Народного Дома“ при ул. Рутовского нр. 22. I пов.

Програма с'їзда:

- 1) Открыте с'їзда.
- 2) Выбор президиума с'їзда.
- 3) Выбор организационной комиссии.
- 4) Доклад о деятельности головной управы.
- 5) Доклад контрольной комиссии.
- 6) Выбор 4-х членов гол. управы на місце 3-х уступающих (через льосоване) и на місце одного умершего, а также 3-х заступников и 3-х членов контрольной комиссии и 3-х заступников тых-же.
- 7) Доклад о недвижимостях Общества.
- 8) Перемена статута Общества.
- 9) Слово посвячене 80-лїтїу основаня Общества.
- 10) Доклад о читальнях.
- 11) Предложение участников с'їзда.
- 12) Закрытие с'їзда.

О 8. год. 30. м. рано будут отолужены св. Литургии с Панихидами за померших членов Общества в церхвах: Преображенской при инст. „Народный Дом“ ул. Краковска и св. Георгиевской ул. Францисканска пр. 3.

Вечером в день с'їзда отбуде ся Народный Концерт.

Предсідатель: Я. Вербицкий.

Секретарь: М. Цебринский.

До читалень им. М. Качковского на Лемковщині.

Каждая руска читальня на Лемковщині повинна взяти активну участь в речном Собраніи Общества, выставляючи с коштомечнем ход лем одного делегата на тото собрание от каждой читальни, одновременно выставляючи Обществу во Львові, коге именно делегуют на с'їзд делегатов.

Рух по наших селах.

ГОРЛИЦЫ. Дня 8 т. м. отбыло ся обще собрание членов нашего общества „Руска Вурса в Горлицах“ под предсідательством г. Дамьяна Бубняка с Вапенного и при секретарю г. Р. Максимовичу с Горлиц. На вступі собрание отдало честь свѣтлой памяти померших членов, а то о. В. Калужняцкого и г. С. Ачицака. Доклады о деятельности представили г. Н. Юрковский и Т. Ядловский. Оказало ся, што в минувшом році шк. общество достало с Амерыны пособій на общу суму 280 ам. дол., часть котрых обернено на сплату старого ипотечного долга в Банку Господарства Краев. во Львові, а часть на утримане бурсы. Кромі того пожертвоване в натурі прислали дакотры села повіта; на перше місце с них выбыват ся село Климовска, потом Ганцова. в обох збором занимали ся школьные сельскы діти, а вконці Скиртне и Гладышов.

Бурса розвиват ся барз добре и дає тепер воспитане и удержане 21 ученикам, с чого 15 ходит до гимназии, а 6 до народных школ. С огляду на также материяльное положеніе на-

шого селянства, с котрого в переважающей части рекрутуют ся бурсаки (на 21 учен.— 17 хлопских сынов), выдѣл бурсы был змушений значно понизити місячны оплаты ученикам. Штобы знов бюджет бурсы на том не потерпѣл обще собрание рѣшило звернути ся до нашей общественности с призывом жертвовать на „удержане бідного бурсака“, а интеллигенция горлицкого повіта декларовала місячны складки на тоту цѣль. По докладі контр. комиссии стверждаючем, што вшиткы книжки и діловодство найдено в полном порядке, послѣдовала обширна дискуссия закончена удѣленем уступающему выдѣлу абсолютории.

До нового выдѣла выбрано: предс. д-ра Я. Сьокалу, містопредс. Н. Юрковского, членами: Д. Бубняка, К. Бодака, А. Вислоцкого, Л. Желема и Т. Ядловского; вступн. чл.: Н. Комару и М. Млынара. До контр. комиссии ввошли: г-жа В. Курилло-Гайдова, Т. Войтерич, В. Малецкий и Д. Златиканч.—Выбрано также особну комиссию, котра має остаточно зредатовати новый статут, застосовавши го до новых вымог властей школьных. Статут тот буде принятый ище того року на назавичайном общем собраніи.

В конци обще собрание приняло односторонне слѣдуючу резолюцию: „обще собрание авертат ся с горячем просьбом до Апостольского Визытатора о. Іоанна Гудечка, штобы Он Своим безпристрастным и вірным представлением положеніе на Лемковщині прискорил діло основаня отдѣльной лемковской гр. кат. епархии, возглавляемой руским епископом, бо лем таким способом очистят ся наши храмы от украинской политики и сіяня роздора, а в наши села верне ся спокой, мир и любовь“.

Присутный.

СЕЛО РАДОЦИНА має свою читальню им. М. Качковского, котру основано в 1926 р. Велика была утіха у нашего народа, коли по трох літах пришол до своего народного маестру, до своего власного читальняного дома. Але ксено тот дом был скалиом в оці для мѣсцоваго сродосія (украинчика) Константина Дачька. Хотяи ксено развалити и зруйновати руский маесток придумал он наконец переписать тот маесток на „Пресвіту“, але же знал о том, же люды на тото не згодят ся, то он вынашол читальню „церковну“ и поробил такую баламуту, же за три роки до читальні нинто не ходил. Аж коли забрали его с нашего села—наша читальня стала на ново проявляти жизнь, до чого причинила ся молодеж, котра вышла с под доброй, честной, русской руки учителя М. Соболевского. Члены взяли ся до работы и зробили дуже. Читальня мала раньше 10 книжок, а тепер по двох літах понад 150. Поспачано также долги Але бо и наша молодеж не дармус. Што року на Рождество ходят наши хлопцы по коляді на читальняну цѣль. Управа устроивала часто забавы, а аматорский кружок отограл чотыри представления.

Робота выходила все удачно и то ище больше, захочало мѣсцеву молодеж до труда. Честь Вам за тото руска, радочинска молодеж! Тримайте ся так дальше. Трудячи ся так, вы повинни горѣти от радости, што творите добре діло не лем для Родоцины, але и для цілой русской Лемковщины. Ставайте дальше до борьбы с темнотом так, як то уж давне зробили други народы.

Теодор С. Костики
библиотекар читальні.

Поміщайте оголошенія в газеті «Лемко».

Кто хце прислужитися нашей газеті, нехай зберат оголошенія с міст и сел повітов Леско, Сяноч Кросно, Ясло, Горлицы и Новый Санч.

Оживлене читальні в Крыниці

Читальня ім. М. Качковського в Крыниці розпочала по короткій перерві на ново оживлену діяльність. Наш духовий оркестр, котрий в останньому році по недостатку дыригенса ослабів в своїх трудах, тепер достал знаного в широкых артыстичных кругах г-на Ропицкого, котрый обняв батуту над оркестром и хором. Знаючи его дарованя и умість удержати дысцыпліну, а также охоту со стороны крыницкой молодежи, можна сподівати ся скоро добрых резуль-татов. Одно лем, о чом треби конечно нам вшиткым памятати, а именно штобы точно и акуратно платили вшиткы так членскы взносы як и приняты на себе с самооподаткованя сумы.

Де того оподаткованя мусиме заохочати также и других, а передовсем повинни оподатковати ся тоты хлопцы и дівчата, котрых учит ся музыкы и співу.

Не можеме от никого жадати, штобы ложил для нас свои знаня и труд даром, бо то была бы жебра-нина, а мы такой не хочеме. Най лем управа при-сылат точно курсора (того місяца ище не зберано грошей) а каждый даст, што прирек и гроши будут.

Член Читальні.

Лемковска співанка.

А там коло річки, а там коло броду
Кличе младай шугай дівчатко по воду

Не піду, не піду мой шугай по воду
Бо я молоденька, обмовы ся бою.

Не бій ся дівчатко, не бій ся нічого
Шугай молоденький, не зробит нічого,

Дві ночы не опала, на третю заснула
Шугай поціловал, дівчина не чула.

Дівчині снит ся, же горлиця бе ся
Шугай коло боку лежат и сміє ся

На же ти дівчатко, два златы на мыло
Два златы на мыло, два златы на пиво.

Мылом вымывай ся, пивом напивай ся
Жебы мама не знала, же-с о шугайом
спала.

Мылом ся вмывала, пивом ся впивала
На шесту неділю мамичка познала.

Дівко моя дівко, што ты наробила
Же ты всю родину во вік засмутила.

Засмутила-м отца, засмутила-м матер
Засмутила-м того, што мене мал взяти.

Не добре мі было косеньку чесати
То мі добре тепер дитя колысати.

А тепер ты дівко ни жена, ни дівка
Лем ты моя дівко світова вандрівка.

Як бы-с была дівком, косу бы-с чесала,
Як бы-с была женом, та бы-с мужа мала.

Што чути в світі.

ВО ФРАНЦИИ ПРИШЛО ДО ЗМІНЫ ПРАВИ-ТЕЛЬСТВА. Предсідатель министрв Думерг уступил и єго місце занял бывший министр публичных работ Флянден.

НІМЕЧЧИНА ХОЧЕ зас вступити до Лиги Народов и взяти участь в конференції о безоруженю.

Совітскый начальник армии на Далеком Востоді, Блюхер, заявил, што совітска армия на Далеком Востоді має таку силу, же границы можна уважа-ти запертыма на замок.

Чехословакия хоче уділити Совітам това-ровый кредит на суму 450 миллионов чешских корон. На тоту суму хоче она вывозити до Росии товары через 3 літа Правительство чешке принимат гваран-цію за заплату купцам за их товар. С Росии хотят нехы вывозити скоры, футра и т. п.

И Німеччина хоче навязати с Росиом тор-говельны сношеня. Она предложила Совітам кредит в сумі 250 миллионов марок на 5 літ, и хоче за тоту суму выслати до Росии тоты техничны выробы, яких Россия ище у себе не выраблят.

Потаніла соль. Тепед коштує 1 кг. білої соли 32 гр. а черной 22 гр.

В Крыниці в парку над дептаком згоріла молочарня «Хорошувка». Причина пожара незнана. Ходят слухы, што пожар повстав от огня сигареток, які курили безработны, котры спали на соломі на стріху молочарні.

Медже Вірхомльем и Півничном повіта Нове-сандецкого усунула ся гора и завалила желізнодорожний тор. На счастье машинист на час спостерег перешкоду и задержал поїзд. Комуникация была часово вздержана.

АМЕРЫКАНСКЕ ПРАВИТЕЛЬСТВО вводит в себе пятилітку для борбы с безработицом. На тоту ціль перезачичило оно 12 миллиардов долларов на роботы, при

котрых найдут заработк безработны а 5 миллиардов на домкы для безработных. В Америці єст околє 15 миллионов безработных. Безработным давало до того часу правительство заемоги, а тепер хоче им дати роботу. Мудре зарядженє.

Габсбург має обняти власть на Венграх.

Будапестенскы газеты доносят, же венгерскый регент Горты має дня 18. листопада уступити со своего поста и же регенция буде повірена архикнязю Альбрехтови Габсбургови.

Арестоване маршала двора югославского.

Раненого в часі убийства короля Александра гене-рала Димитриевича арестовано. Он был маршалом югославского двора и в часі подорожи мал при собі гроши короля и его близкых, котры просили короля о поробленє в Парыжі, закупов для них. Тоты гроши пропали и Димитриевич не може выказати, где и в яких обставинах они згынули.

Комунальна Каоа Ошадности в Крыниці

принимат вклады и платит высокий процент. Уділат также позичок на добрых условиях!

О Б Я В Л Е Н Є

Мищанска читальня ім. М. Качковського в Сяноці устроєє в Сяноці 2-х місячний курс дыригентв, начинаючи (точно) от 3-го грудия 1934. до 31. січня 1935.

Кандыдаты желаючи поступити на курс платят при вписі за науку, помещене с опалом одиеразеве зл. 15. и мают привести с собой:

сінник, престыню, подушку и на аміну білє.

Прошеня принимат до дня 20. листопада 1934. Михаил М. Перелом, предс. читальні, Сянок, ул. Косцюшки 46.

Найліпши условия асекурацийны

д а с

Асек. Товариство
ВИТА-КРАКОВСКЕ
во Львові.



Оно спомагат также наши товариства.

Иформации уділат редакция „Лемко“.

Найліпше и найдешевше

може каждый фурман заосмотрити ся в петребный для себе товар як овес, сіно, січку, смары, подковы, клинцы в своем руском „Фурманском Коопера-тыві“, котрый находит ся в Крыниці Здрою в домі г. Назара Громосяка коло різнї.